

VASTELAOVENDSVEREINIGING MESTREECH-005



67ste jaorgaank • oetgever: Vastelaovendsvereiniging De Keemeleers • www.keemeleers.nl • jannewarie 2016

VORS EGIDIUS LXVII

DOCENTICUS * ACTORICUS * SERMONICUS * TUBICENTICUS

Beriech vaan de Kanselarijraod aan de oonderdaone vaan Keemelstad,
gelege aan d'n ooskant vaan de Maos en ederein dee mèt luustert: salut!

Kemielke woort wakker vaan 't leech wat door de raome vaan ziene stal nao binne veel, zjus op zien linkeroug. Wie heer ouch zien rechteroug opemaakde en op ziene wèkker loerde, zaog heer tot 't zoe oongeveer 11 nao 8 waor in d'n aovend. Dat leech, dat waor aofkomsteg vaan de lampe in de boum vlak bij ziene stal. Magnefiek Magisch Mestreech zat roudt dezen tied vaan 't jaor gans Wiek in 'n zie vaan leech mèt sjoen gekleurde lempkes. Me hoofde thoes de verleechting neet mie aan te doen want 'tsijnsel vaan boete waor mie es genòg.

Dezen tied vaan 't jaor en op tied wakker oet ziene zomerslaop. Kemielke wis wat häöm te doen stoont, want heer mós naor zien jaorlekse aofspraak mèt die jonges vaan de Kanselarijraod vaan de Keemeleers. Noe 't zjubileijaor veurbij waor en de 66e Vors ziene steek en scepter had aofgelag, mós op zeuk gegaange weurde nao de maan dee de Keemeleers zouw veurgoon in hun 67e vastelaovendssezoen. Gaw ziene jas mèt veer erm aongetrokke, móts deep euver zien oere, 'n extra karpètsje op zien bóbbele tege de kaw, blauw mèt witte zokke aan zien pu en Kemielke waor klaor um te goon.

Ze hadde aofgesproke in de sjeem vaan 't elektriciteitshuiske op 't Cörversplein. Ein vaan de wienege plekke in Wiek boe me dat nog kós vinde oondaanks de keersverleechting. Wie heer langs de aw Ridderbrouwerij stievelde in de riechting vaan 't pleinsje zaog heer ze al stoon. 't Evermenneke zoe wie altied huppelend, dee zekere mèt dat hunneke en 'ne nuie. 'ne Zörgzame mins dee slum oet zien ouge loerde. Ze waore 't al gaw dreuver eins tot 't aofgeloupe zjubileijaor good verloupe waor, me had ziech good geammeeerd en ouch bij de Keemeleers waor 't zjus wie in 't leve vaan allen daag, soms mèt 'ne lach en soms mèt 'n traon. Eigelek wiste ze neet good in welke riechting ze móoste goon, tot 't hunneke aan de lijn begós te trèkke. 't Bieske had get roondgesnuffeld, ze pootsje 'ns opgeluf tege 't huiske en staok in eine kier ziene kop in de loch en duide tege de inkele vaan de zekere. Heer wees mèt zien nate neus in de riechting vaan de Victorie en wie ze dao langs lepe, ging hun gedachte trök nao toen... wie de Keemeleers hei keend aan hoes waore. Wie veer nog mer eine Mestreechter Dictionair hadde en 't leve get invojdeger waor.

't Stertsje vaan 't hunneke gleujde e bitteke blauw op, meh dat doog 't altied es 't bieske langs dees historische plek kaom.



Wijer ging 't en ze móoste ziech haos plat duie tege de kiekoete vaan winkels en kaffees um e bitteke in de sjeem te kinne bliuve zoetot hun geine zaog. 't Waor gaw genòg vaan "diech kins miech tralalalala....", en zoe miejer. Langs de blommekraom op 't pleinsje veur de Poshoorn trok 't hunneke hun in de riechting vaan de statie. Tösse 't aajd iezer vaan die èlfdozendèlfhonderdèlf fietsie die dao al jaore op 'ne knab ligke, woort hun aondach getrokke door e pitslempke bove in d'n tote vaan de Colonel. Iers aon, toen oet, daan weer aon en toen weer oet... zoe ging dat op en neer tot Kemielke die drei aandere aonknótsde en zag: "Mein iech dat noe mer of geit dat lempke op en neer op de maot vaan 't nui vastelaovensleedsje?" Emperkes waore häöm die wäord oet ziene keemelbek gevalle, of wie vaanoet 'ne vuurtore riechde ziech in eine kier 'n straal blauw mèt wit leech in de riechting vaan de Céramique. 't Evermenneke begós vaan d'n ambras nog heller te springe, dee nuie wiis neet wat 'm euverkaom en de zekere kós allein mer achter 't hunneke aon renne in de riechting vaan de straal. Kemielke snapde ziech die aander twie, fletsde ze op ziene röggk tösse de bóbbele en wie e sjeep op zie waggelde heer drachteraon.

D'n tunnel euvergestoke sloog 't hunneke links aof en stoont wie bij touverslaag stèl. De zekere strukelde haos euver 't erm bieske en Kemielke had meujtje um zien veer bein oeterein te hawwe um te remme. Die twie aandere vloge links en rechts langs ziene nek en kaome gans verpópkak en op hun achterwerk stèl op 't klein graasperk aon 't begin vaan de straat.

Op 't ind vaan dee weeg stoont 'ne jonge mins te zinge en te springe en nao hun te rope in perfek Mestreechs: "Jao, iech wèl uuch hiel gere veurgoon in de Keemelrikse Vastelaovend!" Sijns nad dee al lang in de gate boeveur de Kanselarijraod dao stoont en laog. Deure en raome ging ope, euveral vloog confetti door de loch en zès köp ging in rijaloet euver de stóppé. Lochballe en slingers hóngé aon klein tuiwkés euver de ganse straat en achter eder raom sijnde blauw mèt wit leech. Meziek oet trompötte kloonk vaan de dake vaan de hoezer. Wat maak 't oet, dach Kemielke wie heer ziech dat tableau bekeek, en lachde vaan bóbbele tot bóbbele um d'n ambras dee waor losgebarste. Wie heer naor die drei vaan de Kanselarijraod keek, zaog heer tot ouch zie't zeker wiste: wie 'ne pot mèt goud aon 't ind vaan 'ne regebaog hadde ze häöm gevoonde, de maan dee de Keemeleers es 67e Vors veur zouw goon in de vastelaovend vaan 't Keemelrik. Kemielke leep langzaam achteroet en drejde ziech nog eine kier um. Zoe'ne gooje höbbé veer nog noets gehad, dach heer en góng door de fietsentunnel op weeg nao ziene stal, örges deep verborge in dat sjoenste deil vaan Mestreech... eus Wiek.

D'n einzulgenger

Gans allein, is heer op de bein
 D'n einzulgenger vint dat jatse fijn
 Heer toek, heer zingk en dans veurop
 En sprik mèt fruitlèdder en kroekestop
 Gans allein, is heer op de bein
 Sprik sjele wawwel tege ederein
 Begaojt, verneuk en späölt zie speul
 En tuint zoe zie vastelaovendsgeveul

Zoegaw 't Momuskenon weer klink
 Daan is 't veur Jean vivelevink
 Oetgelaote rent heer thoes vaan jutte nao jenne
 Totdat zie vruike daan reup: "Jean, jong....enne?!"
 "Mie boterbluimpke...de bis miech eve kwiet
 Totdat iech goonsdag in deen hiering biet"

Es jukebox, noonk Zjeraar of Nètta mèt 'n aw kalbas,
 dat heer weer es einzulgenger geit dat steit vas.



Veer zien uuch gere aan de stasie
 Team Brand Beerhoes

MULDERS

BOUW

Giel Duijkersstraat 3 6226 DD

MAASTRICHT



Slagerij Soffiati



VOOR AL
UW VLEES
EN VLEESWAREN

Alexander Battalaan 2a
 Telefoon 043 - 321 34 81
 Maastricht

Wee is euze nuie Vors?

Euze 67e Vors is gebore in Mestreech en woende tot zien veerde levesjaor in Hier. Daonao is heer mèt zien awwers nao De Heeg geémigreerd en stoont heer es gaminke mèt de Vastelaovend eder jaor langs de kant van de weeg um nao de cortège te loere. In die jaore lierde heer trompöt speule umtot heer zoe gaw meugelek mèt de vastelaovend mèt wouw goon loupe. Heer heet daan ouch jaorelaank mètgebloze bij zate hermenie Um te Jenke, es èlfden trompötter.

Wie ze häöm op 't Jeanne d 'Arc College get wijzer gemaak hadde, begós heer aan zien lierareopleiing in Zittard en góng heer in Wiek woene. Iers e kemerke aon de Sint-Maartenslaon, later 'n appartemint op de Bourgoonje. Staasj leep heer bij Leeuwenborgh en dao voonte ze häöm zoe good tot heer moch blieve. Heer gief lès in de vakke Nederlands en communicatie veur lui die get doen mèt marketing, commerce en eveneminte.

De nuie Vors heet hiel väöl talente. Heer kin good zinge en deit dat 't liefste a-capella es bariton bij Vocal Quartet More. Ouch späölt heer al vaanaof 2000 bij 't Mestreechs Volleks Tejater en de toneelvereineginge vaan Wolder, Heugem, Riekelt en Aajd-Caberg. En boete dat deit heer ziech och mèt de vastelaovend gere e pekske aon. Heer is glorieus winnaar vaan 't Groet Mestreechs Dictee en veer es Keemeleers zalle dus mote goon oplètte mèt wat veer zègke en wie veer sjrieve! Eus moojtaol is get boe-op heer bezunder gruuts is. Heer sjreef e paar stökke in 't Mestreechs en componeerde vastelaovendsleedsjes.

Ziene partner Véronique kump oet Belsj en is vaan 9 juni 1975. Zie is de dochter vaan de bëste slachter oet 't dörp. Zie vóng de bunekes en knebkes die oetgegoed woorte bij d'n optoch vaan haaf vaste in Bilze dee bij häör door de straat trok. Um te Jenke heet dao ouch e paar kier mètgelope, meh toen zaog zie häöm nog neet stoon. Pas wie zie ouch bij 't Volleks Tejater kaom, höbbe zie ziech 'ns deep in de ouge geloerd en waor 't in eine kier raak. Véronique is 'n danseuse pur sang en ze kreeg euze nuie Vors zoe

wied tot ze same op danslès gónge. Dao kaom heer drachter tot mie es twie cha's in 'ne chachacha zitte en nao e paar lèsse good oefene kós zie de besjermende stieveloer oetdoen umtot heer neet mie zoe dèks op häör veuj stoont. Op deezelfden dansvloer vroog heer häör in miert vaan dit jaor ten houwelek, en op deezelfden dansvloer zalle ze koumende zomer ouch goon trouwe.

't Aonstaond echpaar woent aon d'n Heugemerweeg nòmmer 23 en euze Vors is gebore op 18 fibberwarie 1982. Heer steit bij de börperleke stand ingesjreve es

Egidius Carolus Fransiscus Cratsborn

En zal euver 't Keemelriek goon regere oonder de Vorsteleke naome

DOCENTICUS * ACTORICUS * SERMONICUS * TUBICENTICUS

VORS EGIDIUS LXVII

Gedecideerd en gecontrasigneerd te Mestreech-Oos en veurgeleze in de boeteloch in 't bijzien van 't volk vaan Wiek op 17 jannewarie, d'n derde zoondag veur de Vastelaovend vaan 't jaor 183 kier 11 plus 3!

De Kanselarijraod:

Wino van den Bosch * Ed Moenen * Richard Darding

Vastelaovend op 't nui Cörversplein

**'t Cörversplein is zjus klaor en gans obbenuts ingeriech en bestraot.
Veerdeg veur de Vastelaovend vaan 2016.**

De horecaetbaters vaan dit pleinsje goon de koumende Vastelaovend hun utechte bès doen um veur joonk en aajd die gezèlegheid te beeje die de Wieker Vastelaovend nudeg heet.

't Cöversplein is oongetwiefeld 't wermste plein van Mestreech, jummers es och mer ei sträö sijnt, daan is dat op 't Cöversplein in Wiek.

D'n (Hollandse) toeris wèt 't pleinsje nog neet te vinden en dus zien veer es vastelaovendsvierend volk vaan Mestreech "oonder us". Hermeniekies en ander vastelaovendsgekke zalle ziech daor köstelek ammezere. Met de groeten optoch op zoondag en de familieoptoch op maondag is 't Cöversplein ouch 'n manjefieke plaots um alle vastelaovendsvierder s langs te zien trèkke. Mèt 't snuutske in de zon of 't zönneke in de rökg steiste altied aan de gooje kant vaan de brögk.

Ouch veur de vastelaovendsvierders mèt kojtse en klein kinderkes is genòg plaots um te springe en ravotte en pa en ma kinne hun dao de vastelaovend mèt de papplepel ingeve.

Bij kaffee 'Walk about' is op carnavalszoondag en maondag vaanaof 11 oor ontbijt (spek mèt ei) veur alle hermeniekies en ander carnavalsgekke. Netuurlek mèt e lekker pèlske debij.

Bij kaffee Servaos kint geer terech veur 'ne heerleke maoltied en/of de heerlekste 'zuupkes'. Op zoondag en maondag geopend.

Höb geer later op d'n daag pijn aan de puutsjes vaan al dat springe, daan kint geer uuch 'ns lekker gastronomisch laote verwene mèt zonnege tapas bij Tapas Los Amigos.

De groete primeur is op zoondag 31 jannewarie es de Wieker Paraad losbars! Tientalle zate hermeniekies zalle 'acte de présence' geve, 'ne beteren aonluiplao de Vastelaovend vaan 2016 kint me ziech neet winse.

Wiekenere, Mestreechtenere, joonk en aajd, carnavalsfamilies, geer zeet allemaal vaan harte welkom op 't Cöversplein, 't pleinsje wat binne noe en e paar jaor 't gezèlegste Mestreechter vastelaovendsplein zal zien!

Colofon Keemeleersgezèt 2016

Dees vernuilde gezèt nao de zjubile-oetgave is tot stand gekoume door sjrievvers es Alex, Ed, Peter, nog 'ne Peter, Patrick en nog 'ne Patrick, Fred en Richard.

Ouch de adverteerders zien vaan groet belang bij de realisatie vaan de Keemeleersgezèt en aander activiteite. Daouveur daan ouch 'ne groete MERCI! Wie eder jaor woorte de tekste gecontroleerd op fultsjes door de taalkemissie vaan Veldeke.

De gezèt woort aan de binnekant opgemaak door Jan Deckers en aan de boetekant door Cortjens Druk met Communicatie. Zie höbbe dees gezèt ouch gedrök.

Gezèttekemissie:
Peter van der Veur, Jan Deckers en Herman van der Molen.
Adm. wérkaomhede: Bea Deckers

Advertenties:
P.v.d.Veur1@kpnplanet.nl


LUNCH - BORREL - DINER
SERVAAS CAFE | CÖVERSPLEIN 10 | TEL: 043-3217669
E-MAIL: INFO@SERVAASCAFE.NL | WWW.SERVAASCAFE.NL

restaurant
tapas los amigos

Authentieke Spaanse gerechten in het gezelligste Tapas restaurant van Maastricht!

Cöversplein 9
(bij de Servaasbrug in Wyck)
6221 EZ Maastricht

T 043 351 06 65
www.restaurantlosamigos.nl



International Meeting Place

WalkAbout

Rugby - Sports Bar - Football

Corversplein 6 Maastricht www.walkaboutmaastricht.nl

't Jacquetsje

Al 35 jaar hét adres voor uw mooiste trouwpak

Cöversplein 12 - 6221 EZ Maastricht - Tel. 043-3217300 - www.jacquetsje.nl

Openingstijden: maandag, dinsdag en woensdag gesloten
donderdag van 14.00 tot 20.00 uur
vrijdag van 14.00 tot 18.00 uur
zaterdag van 11.00 tot 17.00 uur en verder op afspraak

Veurwoord vaan de Prizzedent

Laot miech dit stökske beginne mèt miene veurgenger Wino van den Bosch te bedaanke veur wat heer es veurzitter de aofgeloupe jaore heet beteikend veur de Keemeleers. Mesjienis wis geer 't nog neet, meh veer höbbe in eus bestuur get wisselinge doorgevoerd 't aofgeloupe jaor. Ondergetekende heet Wino opgevolg es veurzitter en Richard Darding is de nuenen Opper-Keemeleer gewoerde. En geluif 't of neet, dees wisselinge zien allemaol in good euverlègk en zoonder strubbelinge verloupe! Wino heet eus vereiniging op 'n sjieke meneer nao eus 66-jaoreg zjubilei gebrach. Rösteg en vaanoet d'n achtergrond, meh mèt e sjerp oug veur wat ziech binne de Keemeleers allemaol aofspäölt. En es 't nudeg waor daan stoont heer op es veurzitter vaan vv de Keemeleers en wis altied de gooij snaor te rake um alle geziechte weer dezelfde kant oet te laote loere. Ouch nao boete touw heet heer eus vereiniging op 'n manjefieke meneer geprizzenteerd in binne- en boeteland. Heer voont tot eus zjubilei 't good momint waor um e stepke trök te doen en d'n hamel vaan de veurzitter aan iemes aanders euver te drage. Veer kinne allein mer zègk: Wino, 'ne groete chapeau en bedaank!

Mèt die wisseling vaan de wach kaom de functie van Opper-Keemeleer ouch vrij en 't waor al gaw dudelek tot daor mer eine kandidaat veur waor: Richard Darding. In de aofgeloupe twie jaor heet heer al proofgedrejd en de Keemeleers zien dao zoe content euver tot al gaw beslote woort tot heer de nuenen Opper-Keemeleer moch weurde. 'n Groete ier mèt väöl verantwoordelekkheid. Veer höbbe alle fiducie drin tot Richard zien rol op 'n grandioos meneer geit invölle. Iech wins häöm dao hiel väöl succes (en sterkde) bij.



't Is meujelek um te umsjrieve wat d'n geveules zien op 't momint tots te door de Kanselarijraod vaan de Keemeleers gevraog weurs um es Vors de Keemeleers veur te goon in de aonstaonde vastelaovensperiode. Mer ein dink weit iech zeker....aon de "jao" höb iech tijdes de regeerperiode noets getwiefeld. Um es Vors vaan de Keemeleers door 't leve te goon is 'n oongeluifeleke belefenis geweest die miech nog hiel lang zal bijblieve. Iech num uuch mèt nao 'n aontal mominte die iech gere mèt uuch wèl deile.

't Begós netuurlek allemaol mèt Keemeleerszoondag, de spanning jaogde door Mien lief en de lèste mominte oonder 't apemaske waor iech neet mie te hawwe. 't Woort 'ne prachtege daag bijgestande door väöl lui die miech 'n werm hart höbbe touwgredage.

D'n daag vaan de seniorezitting nao de H. Mès in de Martinuskèrk is ouch eine um in te lieste. 't Is sjiek um te zien wie d'n inzat vaan de Keemeleers weurt beloend met 'ne lach op de geziechte vaan de seniore. 'n Evenemint dat zeker moot blieve bestoon.

En noe op nao de Vastelaovend. Wie dèks huurt me oonder lui of leus me in de gezètte tot de Vastelaovend in Wiek op sterfe nao doed zouw zien? "Mèt de Vastelaovend is 't duuster in Wiek es me de Aw Brögk aof kump riechting de Statie..." en "Me vint geine kaffee mie dee ope is nao ach oor 's aoves..." of "Nao aofloup vaan de groete en de familiecartèr llop Wiek leeg..." .

Iech bin 't dao neet mèt eins. De Vastelaovend in Wiek is nog lang neet doed! Es iech kiek nao de activiteite vaan eus eige Keemeleers en vaan cv de Wörtelkes, daan weurt hiel väöl gedoon veur en tijdes de Vastelaovend in Wiek. 't Oetrope vaan de nuie Vors en 't Prinsepaar, seniorezitting en -bal, Vorstebal, de Wörtelkesparaad. De Wieker Paraad veur de zate hermeniekes en de oontvangs vaan de Blauw Sjuut op d'n donderdag veur de Vastelaovend. En neet te vergete de groete opening vaan de Wieker Vastelaovend door de Wörtelkes op de zaoterdag veur tot 't groet fies los geit. Veur groet en klein weurt vaan alles gerangeerd um dat vastelaovendsvirus te behawwe, te beleve en door te geve aan de volgende ginneratie.

En wat te dinke vaan al die bezeuke die door de Keemeleers en de Wörtelkes weurde aoflag in en boete Mestreech es gruitse ambassadeurs vaan de Mestreecher en de Wieker Vastelaovend. De chariteit die bij alletwie de vereiniginge hiel hoeg in 't vastelaovendsveendel steit mèt aondach veur de seniore in Wiek, bezeuke aan Maosveld, Vijverdal en de kraanke Wiekenere in 't azM.

De Keemeleers en de Wörtelkes kinne dat neet allein. 'ne Groeten daank is daan ouch eder jaor op zien plaots aan eus sponsors, adverteerders, club vaan 100 lede en ander sympathisante die 't in geld of op aander menere meugelek make tot veer dat allemaol kinne bliuve doen.

Wee dörf – es me dit allemaol leus – noe nog te vertelle tot de Vastelaovend in Wiek op sterfe nao doed is? Netuurlek, 't kin altied beter en sjoender. 't Zouw good zien es nog miejer kaffees in Wiek hun deure ope hele mèt die drei daog. Daan zouwe veer es Keemeleers 'ne nog groetere rijaloet kinne make door de straote vaan Mestreech-Oos en vaan kaffee tot kaffee goon um us en euze Vors aan 't volk vaan Wiek te prizzentere. Daan koume veer nog väöl miejer lui tege um same dat manjefiek fies vaan Vastelaovend te viere. Daan kinne de lui in Wiek blieve es d'n optoch euver de brögk is getrokke, want daan is 't nog gezèlleger in Keemelstad!

En wat is sjoender es tot me 's aovends vaanoet Mestreech de brögk euver llop op weeg nao hoes en me op de huugte vaan 't manjefiek gerestaureerd Cörversplein kin verzöchte... "iech bin d'r..." en me ziech mèt e paar vrun nog effekes e pëlske kin drinke in eine vaan de gezèllege kaffees die veer höbbe hij aan d'n Ooskant vaan de Maos.

Want leef lui... gezèlleghed die make veer toch zelf en zoe is 't ouch mèt de Vastelaovend in Wiek. Dee maakste oonderein en mèt-ein. Joonk en aajd, bezeuker, bewoener, oondernummer, student. Al 67 jaor weurt in Wiek Vastelaovend gevierz, en dat nump us geine aof. Noe neet en en noets neet!

De Wieker Vastelaovend... dat sjrijfste mèt groete letters en gunste toch ederein!

Veur uuch, lezers vaan dees gezèt, 'ne groete salut en 'ne oonvergeteleke Vastelaovend gewins!

*Ed Moenen
Veurzitter vaan vv de Keemeleers*

Aofsjeidswoord Vors Stephan

Iech höb de Blauw Sjuut mage oontvaange in de Groote Sociëteit op hunne doortrèk nao 't Knoevelemint. Drei daag denao höb iech zelf deil mage oetmake vaan de bemanning en in 'ne kleine cortège zien veer vaanoet Wiek riechting stadhoes gevare. Dao woorte veer opgevaange door de locoborgemeister.

Väöl lui mèt miech en mien vrouw höbbe 'ne heerleke aovend beleef tijdes 't Vorstebal boe us danspeskes weer ins op de proof woorte gestèld. 'ne Oonvergeteleke aovend is us gegeve door de Keemeleers en netuurlek door de presentie van us femilie en vrun en alle genuujde.

'n Oonoetwisbaar momint wats te es Vors maags mètmake is op de wagel in de groete cortège. Veur e hinnevel-momint zörgde 'n prachtege zon, sjeinend in 'n blauw loch, de wagel trèkkend euver de St.Servaos-brögk, mèt in de rögk de Wieker Brögkstraot en in 't vizier de Maosboulevard. Iech höb de vastelaovend al op versjèllende menere mage beleve,

mer um 't te beleve es Vors vaan de Keemeleers is eigelek mèt gein pen te besjrieve. Die belefenis weurt netuurlek ingegeve door de activiteite dies te es Vors maags mètmake mer veural door de lui die dit meugelek make en d'n enthousiasme ondersteune.

Iech wèl, ouch naomes Hazel en de kinder, alle Keemeleers, dames-Keemeleers, bôrgermètwerkers, femilie en vrun bedaanke veur hunne inzat, steun en wermte die zie us in die periode höbbe gegeve.

'ne Magnefieke vastelaovend is us bezörg en zal veur altied in us hart weure mètgredage.

Mien regeerperiode es Vors zit der jaomer genog weer op. Iech höb de kleure blauw en zèlver en roed, geel en greun alle ier aongedoan en de kemiël op han gedrage. Dee kemiël bleif veurluipeg op mien boors ligke want de Keemeleersfamilie gaon iech nog neet verlaote.

Iech wins de nuije vors 'ne fantastische tied touw en geneet vaan alle mominte die diech te wachte stoon....laot 't gebäöre !

'ne Groete merci, aajd Vors Stephan

Callepin 2016

Vastelaovendsvereniging de Keemeleers Wiek (Mestreech)

Dinsdag 12 jannewarie 2016: aofsjeid Vors Stephan LXVI

Venaovend hawwe veer eus protecolair jaorvergadering in euzen hooftempel Hôtel de l'Empereur en numme veer op gepasde wijs aofsjeid van Zjubileivors Stephan de 66e. Ouch reike veer de "loede pin" oet aan iemes dee väöl veur Wiek en Mestreech beteikent of beteikend heet. Aonvaank um 20.11 oor.

Zoondag 17 jannewarie 2016: Keemeleerszoondag

Vaanaof 13.33 oor trèk euze cortège door de straote vaan Wiek mèt de nog oonbekinde Vors, euze 67e, dee veer aonsletend um 14.33 oor bekind make op 't pleinsje onder de klok. Vaanaof 16.00 oor is ederein welkom op eus receptie en de oontvangs vaan aander vastelaovendsvereniginge in Hôtel de l'Empereur.

Zoondag 24 jannewarie 2016: H. Mès en Seniorezitting

In de Martinuskèrk weurt 's mörges um 11.00 oor de traditioneel Keemeleersmès gevierd. Um 13.33 oor begint eus seniorezitting in euzen hooftempel Hôtel de l'Empereur. De Keemeleers zörge weer veur 'nen onvergeteleke middag veur de seniore vaan Mestreech-Oos.

Zaoterdag 30 jannewarie 2016: Vorstereceptie en Vorstebal

Ouch weer in euzen hooftempel Hôtel de l'Empereur beginnt um 19.33 oor de Vorstereceptie en um klokslaag 21.00 oor opent de Vors eus jaorleks Vorstebal. De meziek vaan venaovend weurt verzög door A Next Band. **D'n entree is gratis!**

Zoondag 31 jannewarie 2016: de Wieker Paraad

's Middags is 't um 14.11 oor tied veur de jaorlekse "Wieker Paraad". 'T Wieker volk kint ziech weer ins good ammezere mèt en werme aan de boonte störm vaan zate Hermeniekes in Keemelstad.

Donderdag 4 fibberwarie 2016: de Blauw Sjuut

Zoe rondon de klok vaan 19.00 oor vaange veer de Blauw Sjuut oet Heerle op bij 't Brand Beerhōes. In 'ne cortège goon veer nao 't stadhōes vaan Mestreech veur de oontvangs door 't Gemeinebestuur.

Zoondag 7 fibberwarie 2016: Vastelaovend

Vendaog trèkke veer mèt in de groete cortège vaan Mestreech.

Maondag 8 fibberwarie 2016: Vastelaovend

Vendaog trèkke veer mèt in d'n awwerwètse femiliecortège door Mestreech.

Dinsdag 9 fibberwarie 2016: Aoflaote Kermel

Um 13.00 oor slete veer euze Wieker Vastelaovend 2016 aof mèt 't umlieghole vaan de kermel. Daan zètte de Keemeleers en de Vors hunne steek aof. Veer goon us nog 'n paar oor ammezere en kieke alweer oet nao de Vastelaovend 2017!

De Keemeleers en de Vors nudege uuch vaan ganser harte oet ein of miejer activiteite bij te woene, zoetot de Wieker Vastelaovend 2016 e manjefiek fies zal weure.

Kiek veur 't actueel program en aander nuits op eus website: www.keemeleers.nl

WORTELEMÖPKE VAAN DE WEEK

'Ne knien kump bij bekker Frenske en vraog of heer och wortelevlaoj heet. Frenske móis nein verkoupe. De volgenden daag kaom weer 'ne knien vraoge veur wortelevlaoj. Obbenuits móis Frenske nein zègke. Wie weer 'nen daag later d'n derde knien de winkel oet waar zoonder wortelevlaoj zaog Frenske in zien verbeelding 'n oetbreiling vaan ze assortiment en vaan z'n klandizie. Wie de veerde daag de veerde knien vroog: "Höbste wortelevlaoj?" zag Frenske mèt 'n straolende lach roond z'n lippe: "Jao, die höb iech!" Toen trok dee knien e lielik geziech en slisde: "Vies, heh?!"



RECEP VAAN DE WEEK


Wortelevlaoj

- * 3/4 kilo wortele
- * 2/5 pekske magrien
- * 2/3 tas sókker* 1 ei
- * 2 eetlepels cetroenssap (of miejer)



Maak 'ne boojem vaan ges-deig. Sjrap de wortele en snij ze in stökskes. Kook ze goed gaar en stamp ze fien of plet ze mèt 'n versjèt of vrief ze fien door 'n zeibaor of e zeef. Reur de boter, de sókker en 't cetroenssap dedoer en laot de puree aofkeule. Splits 't ei en reur d'n doojer door de puree. Doeg 't wit in 'nen depen teleur en klop 't op mèt 'n versjèt tot 't stief steit. Ouch dat geit door de puree, meh wel veurziechtig lepele.

Verdeil 't wortelemoos geliekmaotig euver de boojem en bak de vlaoj zoe'n 25 tot 30 minute in d'n ove op 220°C.



De Pastorij

Restaurant De Pastorij & Salles de Fêtes, een culinaire combinatie in perfecte harmonie

Dorpstraat 45 6267 AA Cadier en Keer t 043-4071823 f 043-4071727 www.depastory.nl

Openingstijden: Di t/m Za 18.00 - 22.00. Zo van 13.00 - 22.00 uur. Ma gesloten. Lunch op afspraak, Salles de Fêtes op afspraak.

Krijg Wiek noe eindelek zien eige dames-/hierezitting

Es gezettemaan kump ste wel ins in 'ne kaffee in groet Wiek.
Noe zien der sinds kort twie kaffees obbenuits ingevöld mèt enthousiaste oondernummers die ziech aan 't oriëntere zien in Wiek netuurlek.

In 'n gesprek aan 't bufèt höb iech ins op de körf gestoete wat zie voonte vaan 't organisere vaan 'n dames- en hierezitting in Wiek.

Want Wiek heet dit nog neet en in Wiek loupe toch genòg artieste roond die ouch bekind wèlle weure en zelfs presentators die aan de bak wèlle.

Naormaote 't gesprek en de pèlskes vorderde, woort iech steeds enthousiaster en de kastelein ouch. Veer zien der wel achter gekoume tot dit veur dit sezoen neet mie haolbaar zouw kinne zien.

Mer wee wèt, mesjien wel in 't sezoen vaan 2017.

Dus haw ouge en oere ope, lèt op de brevebös en luuster nao de radio en kiek nao diene mailbox.

De wets mer noets of 't geit lökke volgend jaor.

De gezettemaan.



MAASLANDS LIJSTENMAKERIJ

RECHSTRAOT 77
6221 EH MESTREECH
TÈL. 043. 3250510

VEUR AL EUR KUNS, AAIJD EN MODERN, SPIEGELS EN RESTAURATIE

MAASLANDS ANTIQUARIAT
LIJSTENMAKERIJ RIVE GAUCHE

RECHTSTRAAT 55

R55
WIENKONTOR

ROB FELIX
GLASPROJECTEN b.v.

HR ++ glas...
een goede
investering!

CATERING
THUISKOK
LUNCH
WORKSHOP

06 48266613 - info@adventurecook.nl
www.adventurecook.nl

Team
notarissen

Thissen
Groutars
Vrancken

AvenueCeramique 105
6221 KV Maastricht
T 043 - 3282750
info@teamnotarissen.nl
www.teamnotarissen.nl

"De Wörtelkes vaan Wiek"

Umtot de Vastelaovend dit jaor zoe vreug vèlt, zien veer al in november 2015 begonne mèt 't bezeuke vaan aander jäögvreienginge. Vaanaof 't ierste wickend in jannewarie zien veer daan ouch alweer op stap in 't Mestreechse en daoboete.


Us eige thoesaktiviteite zien dit jaor:

Zaoterdag 16 jannewarie: Oetropke Prins & Prinses, en receptie in uzze Wörtelkestempel in de Basissjaol vaan Wiek op de Rechstraot. Zaol ope: 13.30 oor. Aonvaank: 14.11 oor.

Zoondag 17 jannewarie: Ouch dit jaor goon veer iers mèt in de cortège nao 't oetropke van de nuie Vors van de Keemeleers, en daonao hòbbe veer uzze Seniore-Dansmiddag in uzze Wörtelkestempel. Zaol ope um 15.00 oor.

Zaoterdag 6 fibberwarie: Groetse Opening van de Wieker Vastelaovend op 't pleinsje veur de Poshoorn. En netuurelek mèt 't ophijse vaan de Wortelekrans en 't Kemielke.

KINDER-KARNAVALSVEREINIGING



De Wörtelkes
VAAN WIEK

In 2017 bestoorn de Wörtelkes
33 jaor!
Kiek veur mie info op:
www.wortelkes.nl



Gezond & Wel
GEZONDHEIDSWINKEL SCHREURS BV
ANNO 1948

AL MEER DAN 60 JAAR
EEN GOED ADVIES IN
GEZONDE VOEDING
HOMEOPATISCHE
GENEESMIDDELEN
VITAMINEN / MINERALEN
EN NATUURCOSMETICA

GEZONDHEIDSWINKEL
SCHREURS BV
uw gezond & wel winkel

WYCKERBRUGSTRAAT 22
6221 EC MAASTRICHT
Tel.: 043-3213563

WePe-Mode

Veur de sjus get aandere Mode!

In de Rechstraot op nummer 54

"In de drei Keuninge " kint geer terech veur o.a.
leuke rökskes, sjieke breuk, wollige truikes, kleurige
regejeskes en nog väöl mie!!!
Dus vroului zeuk geer nog get nüts veur aan te doen,
kom daan gerös 'ns binne laope!

(De koffie steit altijd werrem!)



TRAM HALTE

Kitchen & Bar
Rick Moenen en Rob Cimmernans
Cannerplein 1 Maastricht



Amrâth Grand Hotel
★★★★

DE L'EMPEREUR
MAASTRICHT

Stationsstraat 2 • 6221 BP Maastricht

odysse
LIFE IS A PARTY DRESS LIKE IT



Avond en feestkleding
Rechtstraat 92
www.odysse.nl

Zjubilarisse



Alain 11 jaor

Alain Vermeulen, 1 x 11 jaor Keemeleer. Euze jong oet Kier, eine vaan op de berg, vaan hiel wied weg. Alain is ouch in 2005 geïnstalleerd wie de Keemeleers woorte veurgegaange door Vors Oscar LVI. Me vreug ziech mesjian aof wie eine vaanoet 't vastelaovendsriek van de Klenderaire terech is gekoume bij de Keemeleers. Mer dat is gaw verklaord. De veurgenger van Vors Oscar de LVI waor Vors Jos LV, euze 55^e en daomèt zjubileivors Jos Hansen. En laot Alain noe direkte familie vaan Jos zien en dat zjubileitora van kortbij mètgemaak höbbe. Dat beveel häöm zoe good, tot heer ziech al in dat jaor aonmelde es ketelbinkie en vroog of heer Keemeleer moch weurde. En veurtot veer es hierie Keemeleers dao get vaan kóste vinde, hadde eus dames allemaal al "jaor" gezag. Zoe'ne sjone Keemeleer hadde ze noch noets gezeen en zie voonte tot "dee jong oet Kier" hiel väöl goods zouw doen veur de oetstraoling van eus vereineging! En dat allemaal zoonder die aander Keemeleers te kort te wèlle doen, want jao netuurlek, dat waore ouch leuke mennekies! Zoe gezag en zoe gedoon, Alain woory Keemeleer en vaanaof 't ierste jaor al wiste veer tot veer 'ne gooje hadde binnegehaold. 'nen Echten horecaman mèt oug veur detail, perfectie en service. Veer kóste eindelek 'ne lang gekoesterde wins in vervölling laote goon, want veer kóste vaanaof dat momint in de Pastorij terech veur e hiel good verzörg jaorleks Keemeleers Keersdiner wat oetgegreijd is tot 'n neet mie weg te dinke traditie. 'nen Aovend boe-op bekind gemaak weurt of de nuie Vors al is gebore en dee veer e bitteke kinne zien es de neet-officiele opening van eus nui sezoen. Meh dat is nog neet alles. Es echten horecamins ging Alain ziech al gaw bemeuje mèt alles wat met dejeuner, lunch en diner te make had op de versjèllende zoondage tot veer in Hôtel de l'Empereur 'n activiteit hadde. 't Woort dudelk tot Alain dat tot in de puntsjes vaan zien vinger in han wis te kriege: de kwaliteit vaan de organisatie en dat wat op de teleure kaom woorte mèt 't jaor beter. Daoneve wis heer vaanoet zien kontakte sponsore aon te trèkke boedoer veer genete vaan e good glaas wien en water bij d'n diner en e gleske champagne bij 't "aonkleie" van euze nuie Vors. Alain is ouch deginnege dee deuveur heet gezorg tot veer nao afloop van de Wieker Paraad örges in e Wieks restaurant 'ne goojen "femiliediner" veurgezat kriege tege 'ne betaolbare pries. 'n Nui traditie die neet mie weg te dinke is binne eus vereineging. Vaanaof tot heer Keemeleer is gewoerde heet heer ziech es echte veendeldreger veur eus vereineging geprizzenteerd. Lèterlek en figuurlek, want es veer oettrèkke in optochte, dan geit heer hiel dèks mèt in zie sjoenste pekske es euze veendeldreger en dat vint heer eve sjiel – mesjens nog wel sjieler – es tot heer in zie rokkostuum mètlop.

Alain, vaan harte perficia, ouch aan Bianca, veur alles wats diech tot noe touw veur de Keemeleers höbs beteikend. Plak nog zeker 22 jaor aan die lidmaatsjap vas, want "zoe'ne gooje höbbe veer nog noets gehad...!"



Peter 11 jaor

Peter van der Veur, 1 x 11 jaor Keemeleer. Peter is Keemeleer gewoerde daankzij Jeannette. Zie voont 't good tot heer ziech de möts vaan eus vereiniging opzat en ziech in 2005 leet installere wie Oscar Busing de Keemelrikse Vastelaovend veurging es Vors Oscar LVI. Peter is 'ne Keemeleer dee me bijnao neet zuut tösse al die aandere. Besjeie wie heer is blijf heer op d'n achtergrond en trek heer mèt oet. Es heer mer op tied zie gleske beer krijg, daan is heer content en es 't get later op d'n aovend weurt, daan make veer vaan dat gleske beer soms e Spake roed of greun. Want Jeannette heet toen gezag tot heer moch goon es heer mer op tied en hoegoet e bitteke aongesjote weer thoes zouw koume. En dao zörge veer veur! Es oonbesjreve blaad begonne in eus vereiniging höbbe veer Peter al hiel gaw goon appréciere um al zien talente. Es geinen aandere kin heer zoe mer drug oet d'n hook koume mèt 'n opmerking of commentaar boedoer de ganse zaak plat ligg. Aan d'n aandere kant moot geine aon ziene jas koume, want es heer dee neet mie trök vint aon de kapstok krijg metein ederein de sjöld devaan behalve heer zelf. Tot heer dee jas is goon zeuke aon 'nen aandere kapstok es boe heer 'm zelf heet gehaange zal wel aon de twie glazer beer ligke die heer in de kaffee heet gedronanke. Peter is Keemeleer in hart en nere. Heer is altied deginnege dee us opreup um aonwezag te zien bij alle aktiviteite. Heer kin ziech draon sjaggernere es veer mer mèt zes maan en de Vors örges acte de présence geve. Dat huurt neet veur zoe'n sjieke vereiniging wie de Keemeleers, vint heer. En dao heet heer netuurlek geliek in. Peter is 'ne maan dee veer bij de Keemeleers hiel hoeg höbbe zitte. Al jaorelaank llop heer alle oondernummers in Wiek aof um eus Keemeleersgezèt te promote en hun te bewege dao 'n advertentie in te zette. Die gezèt en die advertenties zien hiel belangriek veur de inkomste vaan eus vereiniging en Peter deit dat op 'n meneer die 'ne hiele groete salut verdeent! Sinds kort is heer veurzitter vaan eus pr-kemissie en bemeujt heer ziech mèt alles wat de Keemeleers in woord en gesjrif nao boete bringe. Gei koed woord euver eus vereiniging want daan stelt euze Peter op! En dat wèlste es boetestäonder ech neet mètmake! Ouch bestuurlek heet Peter bliek gegeve vaan talent, heer is es bestuurslid belangriek veur us. Neet allein vaanwege zien humor onder eus vergaderinge, mer miejer nog vaanwege zien soms bezunder gedachte die heer op taofel lègk. Die höbbe soms mie in ziech es tot me zouw dinke! Peter, bedaank daorveur.

Peter, vaan harte perficia, ouch aan Jeannette, veur alles wats diech tot noe touw veur de Keemeleers höbs beteikend. Plak nog zeker 22 jaor aan die lidmaatsjap vas, want "zoe'ne gooje höbbe veer nog noets gehad...!"

Ruyters & De Koning
Wijninkoop

Wijnhuis gespecialiseerd in de verkoop van biologische en duurzaam geproduceerde wijnen

Rechtstraat 49, 6221 EG Maastricht
Tel. 043 - 3210079
www.rudeko.com

COFFEE we love LOVERS coffee


MAASTRICHT COFFEE CULTURE

CL1 COFFEELOVERS DOMINICANEN <i>In fabulous bookstore</i> Dominikanerkerkstraat 1	CL4 COFFEELOVERS AVENUE <i>Coffee in the library (1st floor)</i> Avenue Céramique
CL2 COFFEELOVERS CÉRAMIQUE <i>Urban coffee & lunch</i> Ruiterij 2	CL5 COFFEELOVERS UNIVERSITY <i>Students & coffee meeting point</i> Bonnefantenstraat 2
CL3 COFFEELOVERS THE ANNEX <i>Coffee lounge & terrace</i> Plein 1992	CL6 COFFEELOVERS ST. PIETER <i>Neighbourhood coffee corner</i> Glacisweg 26

Dee vreuge Carneval

"Stelle Nach" klink nog wie'nen echo door mien oere
 De naobers zien de Keersboum nog droet aan 't bezjoere
 Es de Drei Keuninge 't kribke via d'n A2-tunnel höbbe verlaote
 daan zien mien erm en bein obbins gans oetgelaote
 Vastelaovend hingk nao de lèste Jingle Bell in de loch
 Die drei daog stoon te wiemele, hei um de boch
 Is 't pekske veerdeg? Ligke de pruke klaor?
 Of zeet g'r al gesoigneerd sinds Aajdjaor?
 't Benkelek momint kump snel...nao Aajd-op-Nui
 Pak uuch vas, pak uuch vas en staot op oet dee fauteuil
 Fibberwarie prizzenteert uuch de vreuge Carneval
 Confetti zuuste en huurste daan euveral.





sinds 1932

P. HEUBEL

RECHTSTRAAT 45
6221 EG MAASTRICHT
E.P.HEUBEL@HOME>NL
T.043 321 82 19

**MEESTER SCHOENMAKER
SLEUTELSERVICE**




USA ★ GARAGE VERHUIST

PER 1 JANUARI 2016 WORDEN DE WERKPLAATSACTIVITEITEN VAN USA BLOEMENWEG VERPLAATST NAAR DR. BAKSTRAAT 82, 6216 CD MAASTRICHT, T 043-343 78 00. (BIJ WINKELCENTRUM BRUSSELSEPOORT).

CARWASH USA VERHUIST NIET!







EMILE
coiffeur

Dorpstraat 36A - Heer
www.kapsalonemile.nl

Volgens afspraak

Les Froeures Copuleurs

In 2000, 't jaor boe-in Lambèr Smeets Vors vaan de Keemeleers waor, voonte 'n aontal Keemeleers tot 't program vaan de Seniorezitting neet allein gevöld zouw hove te weure mèt algemeen bekinde artieste, mer tot vaanoet de vereining ouch bès wel 'ns get gedoon kós weure. Zès maan höbbe toen de köp bijein gestoke um 'ne 'act' te bedinke. Die jonges vaan 't ierste oor waore Gerry Delnooz, Peter Gordijn, Henk van den Hof, Alex Jamin, Jos Magemans en Ed Moenen. Zie dachte, zeker umtot Henk veur 't geluid kós zörge, tot 't wel leuk zouw zien um 'n compilatie van Nederlandse smartlappe te make. Es kerels oonderein zien, daan weurt 'compilatie' haos vaanzelf 'copulatie' en um 't allemaol get sjieker te laote klinke waor de naom veur 't clubke al gaw: 'Les Frères Copuleurs'. Mèt väöl enthousiasme woorte leedjes oetgezeuk en door Henk geknip en geplak! Oondertosse bedachte de jonges z'ch tot 't ouch wel leuk zouw zien es ze z'ch op 't podium zouwe umkleie... Nao get korte rippetties waore ze klaor veur 't momint vaan de woerheid: de Seniorezitting vaan de Keemeleers! Vaanzelvers móste 'Les Frères' z'ch vaan teveure nog get mood indrinke, mer hun optrejje woort oeteindelek e groet succes; zie zelf hadde hiel väöl lol, en de lui in de zaol stoonte op de taofel (teminste, de lui die nog kóste stoon...).

Umtot ze zoe väöl plezier hadde gehad, zagte de jonges al direk nao hun optrejje tot ze volgend jaor weer get wouwe doen, meh aan aanders. Wie de volgende Seniorezitteng weer draon stoont te koume (Jean Mulders waor toen Vors), woort beslote um weer zoegte wie veureg jaor te doen, meh aan mèt Deutsche Schlager! En oeteindelek bleek dit nog e groeter succes te zien es 't program mèt de Nederlandse smartlappe. Noe had de smaak vaan 't podium 't grupke pas éch te pakke, want al gaw woort geopperd um op Vastelaovendsdinsdag in de Wolfstraot te goon stoon um gans Mestreech mèt te laote genete vaan dat wat zie zelf leuk voonte. Jaomer genòg waore Gerry en Peter (dee euveregens versjrikkelek good teksvas waor...) neet in de gelegenheid um daobei te zien. Toen mós gaw get bedach weure um toch mèt 5 lui 't podium op te goon. Veurtot zie 't wiste woorte Janine en Patrice ingelijf. Die spötterde nog eve tege umtot zie neet wiste wat ze móste doen, meh naotot de jonges hun zagte: 'Doeg mer get', trokke zie mèt de stad in. De naom woort metein veranderd: 'Frères' woort 'Froeures' ('n samevoging van Frères en Soeurs). De meidskes voonte 't oeteindelek eve leuk es de jonges, en vaanaof dat momint bestoonte Les Frères neet mie.


Zoe mèt en mèt vroogte z'ch lui aof of Les Froeures Copuleurs ouch op feeskies optroje. E bitsje verpópzak zagte ze 'Jao', en naotot zie 'gebook' woorte, bedachte ze z'ch tot de lui 't éch leuk voonte... Dat waor 't begin vaan 'n ganse rits optrejjes op broelofte en partije in binne- en boeteland. Daoneve woorte nog nui 'acts' gemaak, zoetot gemekelek afgewisseld kós weure en eventueel 'n aovendvöllend program gegeve kós weure.



Ouch in de samestèlling vaan de Froeures woort gewisseld. Patrice woort vaanaof 1 juli 2008 vervaange door Manon, die häöre vuurdüip kraog op 't fieske bij gelegeheid vaan Gerry Delnooz z'he 70^{ste} verjaordaag. In 'ne bomvolle 'Hallo Mestreech' doog zie 't haos in häör brook vaan de zenuwes, mer zie trooj op alsof zie noets anders gedoon had. Op 12 september 2015 gaaf Manon de microfoon letterlek door aan Odie, die op de broelof vaan Genaud en Roxanne bij wijze vaan rippettiesie Manon vervóng in de 'Zugabe'. Es nui Froeure mös Odie al metein good aan de bak mèt 't inoefene vaan twie programma's. Zie góng thoes wie 'ne wervelwind euer 't karpèt, z'ch neet metein realizerend tot de Froeures optrije op in kis vaan amper 'ne have veerkentige meter.....

Mer ouch mèt Odie is 't allemaol good gekoume. Zie woort veur de liewe gegoejd op 14 november 2015. Toen hadde de Froeures in de Tribunal e fieske bij gelegeheid vaan hun 3 x 5 jaoreg bestoon, en dao heet Odie z'ch lekker kinne oetlaote, en mage v'r blij zien tot ze überhaupt nog vaan 't podium aof wow.... Op dizze aovend, dee op 'n oonnaovolgbare meneer gesprizzenteerd woort door Fred (Ilja Richter) Leclaire höbbe ouch de 'aw' Froeures, Janine, Ed, Jos, Alex en neet te vergete Henk (!) euvéäol genote es de lui die in de kaffee waore. Hopelek weurt 't Les Froeures Copuleurs, es God bleef, gegeve nog lang door te goon mèt dizze 'oonzin'.





Integrated Financial Services

**Verzekeringen,
Pensioenen,
Hypotheiken,
Sparen**

mr. Eduard H.M. Moenen

St. Maartenslaan 29
6221 AV Maastricht
Telefoon 043 - 321 48 70
Mobiel 06 - 23 86 40 92
info@ifsmaastricht.nl

www.ifsmaastricht.nl



Veer winse uuch 'ne gezellige
Vastelaovend

infocafewyck@gmail.com

A.Battelaan 47A 6221CB Maastricht Wyck

Wieker Paraad 2015

Umtot dudelk woort tot de Wieker Paraad de lètste jaore neet mie 't evenemint bleek te zien wat veer geweend waore, zien 'n aontal Keemeleers op 'nen avond um de taofel goon zitte mèt 'n aontal vertegewoordegers vaan de Hermeniekés, de hoofrolspeulers van de Wieker Paraad! Veer wouwe vaan hún, neve de gooij dinger, veural hure wat zoe-al verbeterd kós weure veur wat de ranzjatie betròf. Nao e zier plezereg en informatief gesprek zien v'r allemoal mèt elan trökgegaange nao eus eige clubkes, en höbbe us oonderein belaof um de Wieker Paraad weer nui leve in te bloze. Zaate Hermenie 'Veur de bok z'n kloete' doorbraak daouveur zelfs häör traditie um neet veur Vastelaovend oet te trèkke!

Op 8 fibberwarie 2015 um 13.30 oor waors 't aan zoe wied: tied veur de hermeniekés um aan te trejje bij De Poshoorn, um vaan daoroet speulentere door de straote vaan Wiek nao de versjèllende kaffees te trèkke. In vergelyking mèt veureg jaor hadde z'ch al twie kier zoeväl hermeniekés aangemeld veur de Wieker Paraad. Daoneve had Ger vaan De Poshoorn 't meugelek gemaak um de ganse middag "C'est Ça" bij 't podium te laote speule. Tot aan de priesoetreiking waor 't 'n kourne en goon vaan de mies versjèllend klinkende toene; eder hermenieke had z'en eige klaank..... en wie ze oeteindelek um 'n oor of haaf zès verzameld waore bij 't pleinsje vaan 't podium, hadde v'r bijnao 't geveul tot v'r nao e groet symfonieorkes aon 't luustere waore, en woorte v'r volledeg mètgesleip in 't enthousiasme vaan dat geweldeg fenomeen vaan de Mestreechter Vastelaovend: de zate hermeniekés!

Neve 't groet plezeer wat zie oetstraolde, gaove de hermeniekés z'ch gans euver aan hun muzikalo kwaliteite: de trommeleers houwde z'ch de blaore op hun han en de blozers lete hunne bësten ambesjuur hure. Dat maakde 't veur de jury in de kaffees en op 't podium allein mer meujeleker um 'ne winner van de Wieker Paraad 2015 bekend te make. Naotot alle punte geteld waore en nog 'ns geteld waore, kaom nao 'n 'nek-aan-nek-race' Zate Hermenie 'Blamaasj' es winner oet de bös en koste veer trökkieke op 'n fantastische Wieker Paraad 2015, die weer perspectief gief um dit evenemint weer wijer oet te bouwe nao wie 't 'n aontal jaore geleie waors. Welliech verdobbelt z'ch 't aontal hermeniekés in 2016 weer en es 't zonneke daan zjus zoewie in 2015 sjijnt, daan höbbe v'r op 31 jannewarie 2016 vaanaof 14.11 oor obbenuits 'he moorddaag'!

'ne Weegwèrker kump bij de vrouw vaan 'ne collega um häör te vertèlle tot häöre maan 'n oongelök heet gehad. Heer is door 'ne wals euverrije. "Miene leven hiemel!" zeet die vrouw "en boe is heer noe?"

"Op 't hospitaol". "Op welke kamer ligk heer?" "Heer ligk op aofdeiling C, kamer 9 t/m 17..."

**Veer winse alle Keemeleers en de 67e vors
'nne kleurieke vastelaovend**



Rob Smeets
Schildersbedrijf 
www.schildersbedrijfsmeets.nl
(043)3219055

TWEEWIELERSPECIALIST

**AON DE
STASIE**


Verkoop Verhuur Reparatie Stalling



STATIONSRIJWIELHANDEL

Stationsplein 26 * 6221 BT Maastricht * tel. 043 - 3211100

Nu ook: Sphinxlunet 1, Maastricht



Hilti
SEIDENSTICKER
ENZO LORENZO
pierre cardin

BALMORAL
MEN'S FASHION

Wijckerbrugstraat 53 Maastricht Tel.: 043-3213200

Neet mie es kaffee,
mer wel es restaurant!



Komp g'r mét vastelaovend bij us ete?

Reservere: 043-3217016

Mariastraot 9 Mestreech

Friandises
Chocolatier

De vermaarde pralines van Maastricht



Bakkerij Hermans
FAMILIEBAKKERIJ SINDS 1936

www.bakkerijhermans.nl 043 321 31 17



Rechtstraat 24-26, 6221 EJ, Maastricht

Dat geeft het zich niet

Wis geer tot in Wiek stellekes aan ummertouw mie winkels verandere in filiale vaan nationaal en internationaal bedrieve?

Dat hét in tot veer es vereining ummertouw minder te make höbbe mèt Wiekse/Mestreechse oondernummers.

En 'n aander vraog is boe eus dialek nao touw geit en och de Vastelaovend, Heiligdomsvaart, Reuzestoet en neum mer op?

E groet deil vaan eus sponsors, die 't cultureel leve in Mestreech ondersteune, zal mesjens wegvalle.

De sponsors die wel nog adverteire in gezetsjes, wie dat vaan de Keemeleers, mote dreever na oodinke wie ze hunne doelgróp wèlle goon aonspreke.

Eure sjrijver vaan dit stök wérk touwvalleg bij 'n vleisspecialiteitezaak in Wiek, bekend um häör Mestreechse waor. D'n eigeneer is netuurlek gewee nd um zie waor in 't Mestreechs aan te prije en ederein is bekend mèt de sprek: "Mieljaar, wat e lekker vleis!"

Wie moet heer dat noe op 'n internationaal meneer goon aonpakke? Weurt z'n sprek daan: "Damn, what a delicious meat!" of "Verdammt, was für ein leckeres Fleisch!"? Dat gief 't zich toch neet...



Joep Schürmann vleesspecialiteiten

Joep Schürmann vleesspecialiteiten Wycker Brugstraat 27 Wyck Maastricht 043/3213913

Met de Franse taol höbbe de oondernummers minder probleme, dao zien ze mie mèt vertrouwd en groetgebrach. Num noe beveurbeeld trappis en tête -de-veau, kriek Lambiek en Franse friet, mèt Keersemes Franse wien, beer en raclette en 's mörgens haange v'r euver 't toilet. Want vaan beer en wien, kinste soms zoe kraank zien.

Wie koume veer noe in kontak mèt de nui oondernummers in Wiek? Es gezèttemaan höb iech dao wel get las vaan, want wat m'ch vaan veureg jaor is blieve haange, wie lesteg 't kin zien, wèl iech hei toch eve kwiet. Iech dach, iech gaon 'ne erotisch getinte winkel binne in Wiek. Iech wouw dao neet herkind weure en daorum had iech 'n badmöts op (huurt g'r de lui aanders al euver miech zègke: "dat gief 't zich toch neet, 'n Keemeleer boe 't thoes get minder geit")

Enfin, mèt badmöts, gezèt en prieslies, gewaopend met 'ne slogan, koum iech dao binne. Wat dee slogan waor, weet iech niet mie zo perceis, meh 't waor get mèt dames Keemeleers en hier Keemeleers die altied op tied thoes waore en euveregens bin iech aan dee slogan noets touwgekoume. Want naotot iech miech had veurgesteld zag 't meidske: "Daarvoor moet u op het hoofdkantoor in Heerlen zijn". En toen zag i ech: "Dat geeft 't zich toch niet? Moet ik met de trein naar Heelder!"

In sommege kaffees is 't ouch al neet gemekelek: este e piepke bestels, krijgste 'ne pint. Weer dach iech aan de oetspraak van Theike Dols vreuger: "Dat gief 't z'ch toch neet, Limbö rgse kaffees, Limb örgs beer en wijer gei gezeik!"


Meh alle gekheid op e stekske: veer goon wijer en liere dao bès wel met um te goon en slete aof mèt de sprek: "'t Kump allemaal weer good".

De gezèttemaan



Vastgoedadvies | Beheer | Verhuur

www.portosvastgoed.nl



Bouchon d'en Face
Wyckerbrugstraat 54 . 6221 ED Maastricht

Antiquariaat Librairie
Stille
6221 EH Wyck-Maastricht Rechtstraat 85
tel +31 43 321 99 23
stille-antiquariaat@planet.nl

JOHN
MULLINS
MAASTRICHT
Wycker Brugstraat 50
Telefoon 043 - 3500141

HARRY'S
SINCE 1912
wycker brugstraat 2 Maastricht
043 3254433
WWW.HARRYSRESTAURANT.NL



De Keemeleers in 1973 op bezeuk in ein vaan de boetewieke vaan Mestreech: Malberg. Vors Bennie Ummels en de drei dansmerietsjes zien daobij. De Sproetekapel is vaan de famfaar vaan Biesland.



De Keemeleers René Royen (links) en Karl Pregled (rechts) bringe de vlaoj ter gelegenheid vaan 't 1x11 jaoreg zjubilei vaan de Keemeleers Huub Stallinga (†) en Herman van der Molen nao binne. Frappant detail: de Keemeleers René Royen en Karl Pregled viere noe (2015/2016) hun 3x11 jaoreg zjubilei.



Ein vaan de ierste kiere vaan 't ophaange vaan de kemiël; hei aan 'n verkiersbord tegeneuver de Poshoorn. Behalve uzze "historicus" Herman van der Molen zien veer Jean van Hoorn (†) (rechs, Opper) en John Cerfontaine (†) dee de kemiël optrèk.

OET DE AW



ESSO Smeermaas

Maaseikersteenweg 233



LUKOIL Lanaken,
Koning Albertlaan 227
3620 Lanaken

Mieke v.d. Molen



Dees foto is genome in 1975 tijdens de H. Mès veur de 25e Vors Ed Driessens (†). Heer woort "de zèlvere Vors" geneump. De H. Mès waor in de noed-kèrk in de Rechstraot. Ter gelegenheid vaan dit zèlvere zjubilei is toen de zèlvere këttel gemaak mèt zèlvere stare gemaak door Jef Lahaye. In de aafgeloupe jaore heet Jos Magermans hiel väöl werk gehad mèt reparaties aan die këttel en heet heer dao gèt prachtegs vaan gemaak.



Dit is 'ne wage oet 1979, gemaak door 'n aontal Keemeleers, veur Vors Harry Beaumont. D'n oplègker waor vaan Iereraodslid Lambert Ravesteijn (†).



D'n drumband vaan de Wieker Famfaar begeleit de Keemeleers vaanoet de l'Empereur nao de Martinuskerk van Wiek. Al jaore laank verzörg de Wieker Famfaar op 'n geweldege meneer de muzikale begeleiding vaan de H. Mès op Keemeleerszoondag.



De Keemeleers höbbe jaore laank 'ne Iereraod gehad. Hei zien veer twie vaan de lede: veuraon Lambert Ravesteijn (†) en deneve Giel Abels (†). De foto is genome bij de receptie vaan Vors Herman Kromjong. Ouch zien veer Tom Hameleers (†) (zoonder stek) dee medaajemeister waor en dat hiel lang heet gedoon. De functie vaan medaajemeister is later euvergenome door Jos Magermans.



Deze foto is genome véür de Victoria in de Wieker Brögkstraot. 'T Waor bij de installatie vaan Vors Benno Ummels in 1973. Indeen tied hadde de Keemeleers twie adjudante in 'n hiel eige kostuum, te zien bij Bert Cortjens (2e vaan links). D'n 2e vaan rechs is Raymond Leenders (†), ouch es adjudant (later is heer wethawwer vaan de gemeente Mestreech gewees). 'T Köfferke gebruike de Keemeleers nog steeds. De hiere woorte jaorelaank bijgestande door drei dansmerietsjes. Hielemaol rechs steit Herman van der Molen dee toen sjs Keemeleer waor. Dit waor de leste kier tot de Keemeleers gebruik maakde vaan den hooftempel "de Victoria".



Hei zien veer Vors Herman Kromjong in 1981. Ter gelegenheid vaan 't inhole vaan de Stadsprins is de MG-club gevraog. De veurzitter vaan die club waor Tom Hameleers (†), links mèt pet. De wage boe in Vors Herman woort gereijje, is de rooje MG vaan Herman van der Molen (in 't midde).

DOES

De Worteleboer

Jos Magermans heet mèt succes de kunsacademie doorloupe: heer heet dao 'ne cursus veur beeldende kuns in 11 maonde gedoon en wat 't gekos heet, wèt geine. Mèt dee opgedone kinnes is heer in staot um e beeldsje vaan de Worteleboer te verveerdege in 'n zier beperkte oplao.

Dit beeldsje goon veer, es vv de Keemeleers, oetreike aan zjubilerende vereineginge en lui die vaan bezunder beteikenis veur eus maotsjappij zien.

Iech hoop daan ouch tot deginnege die dit beeldsje mage oontvaange bezunder gruuts drop zalle zien.

Noe nog get euver de historie vaan dit beeldsje.

Die vaan Mestreech voonte die vaan Wiek mer nik. Zoewie alle lui vaan boete Mestreech boere woorte geneump, waore die vaan euver de brögk dat ouch.

En zoewie oet Sint-Pieter de Mooswiever koume, koume oet Wiek de Worteleboer. Veur de Mestreechteneer 'ne sjelnaom, veur de Wiekeneer 'nen ierenaom, 'ne geuzenaom mèt 'n langer traditie es die vaan Mestreech.

En noe kinne ze neet zoonder ein, want um in Mestreech te koume mooste jummers door Wiek. Wat es veer tol zouwe heffe? Daan leep alles in de sop. Nein, nevenein stoon is beter veur us allemaol. En dao drinke veer daan e gleeske beer op en ete e stök wortelevlaoj.



Groote Sociëteit Maastricht

UNIEKE HORECA-RUIMTEN OP EEN BIJZONDERE LOCATIE

*mèt de vastelaovend
zien veer 3 daag geopena
veur joont en aajd*

VRIJTHOF 36 6211 LE MAASTRICHT TEL. 043 3212887

GREEN SHOP
MET VERS VOOROP
Wiek
veur al eur vitamiene

Tabaksspeciaalzaak Maastricht
Rechtstraat 25
telefoon 043 321 38 97
Groete humidorkamer
en...
noe ouch gespecialiseerd in penne
(Visconti, Dupont, Waterman,
Caran d'Ache, Parker, etc)
veer winse uuch unne sjieke vastelaovend

vorm licht)

Technisch installatiebedrijf
Licht- en krachtinstallaties
niewbouw en renovatie
Domatca
Airconditioning
Designverlichting

Rechtstraat 8-10 6221 EJ Maastricht Tel 043 3215454 www.vormlicht.nl

Confetti in 't blood!

In 'ne volle meziekfabrik aan de Boschstraot woort in november de verkezing vaan 't Mestreechs vastelaovesleedsje gehawwe. Dit jaor doge zeve leedsjes met in de finale. Naotot de leedsjes twie kier waore gezoonge koste de luij in de zaol keze en via internet en sms. Nao 'ne spannende finale woort 't leedsje confetti gekoze tot vastelaovesleedsje van 2016. Heij volleg e interview met de komponis vaan 't vastelaovesleedsje Patrick Ummels (aajd vors vaan de Keemeleers oet 2008).

Wie lang daot geer al met?

Al hiel lang um persijs te zien 24 jaor laank. 't Waor lang wachte zalle veer mer zegke. Iech had al hiel deks de twiede, de derde en de vierde plaots behaold. De oetdrökking de aonhawwer wint is heij wel vaan touwpassing. 't Waor 'ne biezondere oetslaag umtot iech ouch nog de nommer twie had gesjreve. 't Is ouch vaan belang um veural 't plezeer in d'n aonluip te onderstriepe. 't Inefisternölle vaan zoe leedsje is netuurlek ouh hiel erreg leuk. De zuus zoe leedsje vaanoet diene kop ontstoon en daan geit 't in eine kier op pepier stoon. De löps demet euver straat marsjeers d'rop en zoe weurt 't langsem e leedsje. Daan weurt weer get gesjrap en daan kump weer get debeij. Oetindelek weurt 't leedsje ingesjik en daan geit 'ne zjurie ziech euver die leedsje buige.

Wie geit 't daan weijer?

Es de leedsje gesillekteerd is daan weurste gebeld door de zjurieveuritter. Op de maondag aonsletend maagste daan e leutsje trekke met dien nommer en weurt de leedsje besproke met de studio die daan metein aan de slaag goon um 't arranzjemint te make. Dat beteikent dat veur eder instremint watste huurs op de plaat 'n meziekpartij moot gesjreve weure. Dat is hiel väöl werrek. De studio nump daan alle instreminte op en daornao zien de zengers aan de beurt. Veer zonge dit jaor met de zes köp, boe veural 't plezeer hiel belangriek is. De kiere tot veer rippetere weurt hiel get aofgelache. Dao kump dus hiel get bij kieke. Daan beluustert de zjurie alle rizzeltaote en die make daan veur 40% de deens oet. Daan geit 't leedsje naor de prominentezjurie good veur 10%, (dat zien daan de kasteleins, vastelaovesgroppe enz). Mer de doorslaag gief toch altied de stum vaan 't vollek.

Noe höbste eindelek gewonne... en daan?

Now de wels 't neet wete. Daan koume de blomme, keertsjes en neet te vergete de confetti. Noe höbbe veer hiel váöl aonvraoge um te goon zinge bij alle vastelaovesvereiniginge mer ouch zittinge, bejaordehoezer, sjaole en gaank zoe mer door. Euveral boe veer koume weure veer biezunder good ontvaange. 't Leedsje is nao eine kier gemekelek met te zinge. Veer winse Mestreech váól plezeer touw in de aonluip nao de vastelaovend en vergeet de confetti neet.

Twie maanslui zitte op 't daak nao 'n euverstruiming en zien vaanalles langsdiere. Op e gegeve momint kump 'n möts langs, tege de stroom in. Iers lètte ze dao neet zoe op, meh wie 't mötske veur d'n derde kier langs kaom, zeet d'n eine: "Wie kin dat noe, dit is noe al d'n derde kier tot die möts langs kump?" "Nou" zag d'n aandere, "dat is miene noonk, dee heet gisteren gezag, weer of gei weer, meh mörge daan iech 't graas aof...".

In de rekenlès zuut de juffrouw tot Jèfke weer neet oplèt. Ze reup: Jèfke, wat is 2 en 4 en 28 en 44?" Jèfke zeer metein: "Nederland 2, RTL 4, BRT 1 en Eurosport".

HOTEL & TAPPERIJ



de Poschoorn

**De Vasteloavendstempel
vaan Wieck anno 1949**

**Veer winse uuch"ne
gezellege vasteloavend**

www.poschoorn.nl

Stationstraat 47

6221 BN Maastricht Wijck

Email: poshoorn@hetnet.nl

Tel: 043-3217334

Veldeke
KRINK MESTREECH

't Rommedoeke

Kaas - fijne vleeswaren - noten & wijn



Brusselsepoort 37 6216 CG Maastricht

Wycker Brugstraat 43 6221 EB Maastricht

De Leim 8 6227 CT Heer, Maastricht

Tel: 043-343 03 08 www.rommedoeke.nl

WRI

WETERING RAADGEVENDE INGENIEURS MAASTRICHT
brandveiligheid | Akoestiek | Bouwfysica | Installaties

Sint Maartenslaan 23, 6221 AV Maastricht
T + 31 43 321 16 43



ABN·AMRO

Veer winse uuch 'nne sjieke Vasteloavend!

loede Pin

In 't naojaor vaan 2009 is bij de Keemeleers 't idee oontstande um eder jaor 'ne persoen te iere mèt de "Loede Pin". De bekinde "Pin" vaan de Keemeleers, meh aan oetvergroet en in loed gegote op e sjoen breet vas gemaak. Iemes dee ziech in eus ouge op wat veur meneer daan ouch verdeenstek hiet gemaak veur Mestreech en veur Wiek in 't bezunder kin daouveur in aonmerking koume.

En zoe gebäörde 't dat in 2010 door Vors Jack LX de ierste Loede Pin woort oetgereik aon Paul Rinkens, op dat momint veurzitter vaan MVV en eigeneer van Town House Hotel in Wiek.

In de jaore die volgde woort de loede Pin ouch oetgereik aon:

2011 – Wim Hazeu – Wèthawwer gemeinte Mestreech
 2012 – Harrie Beaumont – Eigeneer Hotel Beaumont
 2013 – Lenie Menten (postuum) – Accordeoniste, Mestreechse arties
 2014 – Sheila Oroschin – OIW en The Masters
 2015 – Ger Franzen – Eigeneer Hotel & Tapperij de Poshoorn



En noe in 2016 is de Loede Pin oetgereik aon 'ne persoen dee al mie es 50 jaor de lui vermaak mèt ziene meziek. 'ne Maan dee altied klaor steit veur de chariteit en seniore in eus maotsjappij.

Begonne es trommeleer bij hermenie de Gele Rijders oet 't Wittevrouwenveld wis heer wat marchere waor en dat kaom häöm good vaan pas wie heer daoneve achter de bal aonrende in 't twiede vaan MVV. Umtot heer de balle dèkser oet de Geusselt es in de gool vaan de tegepartij sjöpde, kraog heer de gooje raod um te keze veur 'n muzikaol loupbaon.

Vaan trommeleer woort heer echten drummer bij bekinde gróppes "Opus" en "The Sharons" en op dees meneer heet heer hiel väöl vaan Europa gezeen. Oetindelek is heer via de Bananeboxer (en nog ein... en nog ein... en nog ein...) op 't spoor gezat vaan dialekmeziek. Iers kump heer terech bij de "Straotzengers" en later (wat volges häöm hielemal neet besteit!) bij de "Nachraove".

Es Volleybalclub Sutherland vreug of heer e clubleed veur hun wèlt sjrieve, geit 't gaw. Op d'n aandere kant vaan 't pleetsje mèt 't clubleed steit naomelek "Sjogkel, sjogkel" en dao weurt de ein fiestent nao de aander mèt op ziene kop gezat!

Kort daonao krije heer vaan 'ne kastelein oet Gölpe e cassettebendsje met 'n "leuke melodie" en daan is 't succes hielemal compleet. Mèt "Sjeng aan de geng" geit gans Mestreech, Limbürg, Holland en Belsj oet zie daak. Zelfs d'n Hollandse radio drejt de nómmer en 't heet neet väöl gesjeeld of Frans waor zelfs in d'n Top 2000 terech gekoume op plaots 1111!

Ederein wèt tot Frans 'n hiel groet hart heet veur de chariteit. Altied steit heer väöraon es de vraog kump um op te trejje veur de lui die us de Vastelaovend mèt de paplepel naor binne höbbe gesjöd of veur kinder en lui die 't door hunnen handicap neet zoe gemektelek höbbe es veer. Es iemes d'n titel vaan "Ambassadeur vaan Mestreech" verdeend, daan is dat euze Frans Theunisz!

Es Keemeleers zien veer daan ouch bezunder gruuts drop tot veer de Loede Pin 2016 mage oetreike aon Frans Theunisz.



Nancy Tours
Herman v.d. Molen



Voor al uw touringcar reizen

Postbus 4312
 6202 VA Maastricht
www.nancytours.nl
info@nancytours.nl

Tel. +31 - (0)43 - 3632558
 Fax + 32 - (089) - 722303
 GSM +31 (0)6 53 322667

Zjubilarisse

*Rene 33 jaor*

René Roijen, 3 x 11 jaor Keemeleer. Wat de Keemeleershistorie betröf zouwe René en Karl breurkes kinne zien. Ouch René trok al mèt de Keemeleers mèt wie heer nog neet geïnstalleerd waor. Heer waor eine vaan de "opvöllinge" die in rokkostuum mèt moste naa de receptie vaan de zjubilerende Winkbüllie in Heerle. En umtot ouch heer ziech dao good gedrage had, moch heer ziech vaanaof 1983 ech Keemeleer neume. 't Waor al gaw dudelek tot ouch René gein twie linkerhan had en ziech neet al te dèks op ziene doum houwde es heer mèt 'nen hamel bezig waor. Heer trooj touw tot de bouwkemissie en sleutelde mèt aon euze vastelaovendswagel. Dat waor zie dink, dee wagel. De vereining kós doen en laote wat ze wouw, meh René trok eder jaor op Asselegoondag nao Bergen op Zoom en kaom trök mèt 'ne nuie wagel of onderdeile daoveur. En es veer al repe tot dee vaan veureg jaor sjoen genòg waor, daan leet heer 't jaor drop zien tot 't altied nog sjoender en beter kós! Heer voolt ziech thoes in de loods in Bilzen en heet dao, same mèt de res vaan de bouwkemissie, jaorelaank genote neet allein vaan 't bouwe aon de wagel, meh zeker ouch vaan de sop en de kaw sjotel die Henk Schoenmakers zelf maakde en edere zoondagmiddag nao Belsj kaom bringe. Meh René had nog miejer talente. Jaorelaank is heer euzen habsjaar gewees. En dat in d'n tied tot de computer nog mós weurde oetgevoonde. Oonder in de kelder bij Henk van den Hof kaome bij eder bestuursvergadering de kasbeuk op taovel. Groete kasbeuk boe-in 't gans financieel sezoen mèt potloed waor opgeteikend. Mèt potloed, want dat waor gemekelek oet te gumme es Henk voony tot de BTW aanders mós weurde verrekend en tot sommege inkomste en oetgaove neet hielemaol good in balans waore. 't Klopde altied en pas wie Henk eindelek wis wie heer met zien computers mós umgoon, is dat groet kasbook verdwene en alles umgezat naor digitaal eine en nulle. Toen heet René mèt pijn in zien hart de financies aon Henk euvergedrage. Vaanaof toen kós heer ziech hielemaol riechte op deen aandere hobby vaan 'm, chauffeur vaan de vastelaovendswagel. Netuurlik moch geinen aandere achter 't stuur vaan 't "trekkend voertuig" zitte es René. Dat voont heer neet allein zelf, mer veer es Keemeleers ouch. Want 't is nogal get um met zoe'ne groete praoiwagel door de smal straote vaan Mestreech te lavere. Laot stoon totste mèt zoe dink de Aw Brögk mós oprije en aan d'n aandere kant d'n drej mós make riechting de Kesselskade. Meh René kós dat en heet ziech jaorelaank (en noe nog) good vaan die taak gekwete. Dat wèlt zègke es me vergit tot heer altied zjus op tied of effekes te laat waor bij de optochte, mennege band kepot heet gerije, hei en dao blötse heet verzameld en zelfs 'ne umgerijen deender op zie palmares kin bijsjrieve!

René, vaan harte perficia, ouch aan Marlies, veur alles wats diech tot noe touw veur de Keemeleers höbs beteikend. Plak nog zeker 11 jaor aan die lidmaatsjap vas, want "zoe'ne gooje höbbe veer nog noets gehad...!"

Karl 33 jaor

Karl Pregled, 3 x 11 jaor Keemeleer. Karl is in 1983 geïnstalleerd wie Henny Hermans Keemelstad veur ging es Vors Henny XXXIV. Meh e jaor daorveur, in 1982, trok heer al es Keemeleer mèt oet. Dat waor nog in d'n tied tot get weinig Keemeleers waore en me nui lui nudieg had. De Winkbüllie oet Heerle vierde in dat jaor hun zjubilei en de Keemeleers kóste netuurlek neet mèt minder es 11 maan op de receptie in Hoeve de Aar versijjine. E rokkostuum waor gaw aongesjaf en zoonder geïnstalleerd te zien moch heer al mèt en preuve aon 't Keemeleer zien. Dat is häöm en de club zoe good bevalle tot heer wie gezag in 1983 geïnstalleerd woort es volwierdeg Keemeleer.

En vaanaof 't begin heet heer ziech op 'n grandios meneer veur de club ingezat. Umtot heer e bitteke hendeg bleek te zien mèt hamels, baore en sjrouvendrejiers woort heer al gaw lid vaan de bouwkemissie en wèrkde heer jaorelaank aon de vastelaovendswagel vaan de vereining. Daoneve bleek heer ouch euver organisatietalente te besjikke. Dao is 'nen tied gewees tot 't get minder good ging mèt de Keemeleers. Dao woort get väöl gebeursteld oonderein, hei en dao kós me neet mie mèt-ein door ein deur en de vereining maakde 'ne zweeren tied door. Toen heet Karl de veurzittershamel opgepak, e paar kier hiel hel demèt op de taovel gehouwd en de club binne e paar jaor weer op de rit gekrege en gezoond gemaak. Dao plökke veer noe nog de vröchte vaan. Daoneve is heer mèt einege regelmaot lid gewees vaan de Kanselarijraod mèt de zweer taak de nuie Vors oet te zeuke. Ouch dat heet heer altied mèt belump gedoon. Tot heer creatief is maag blike oet 't feit tot heer de medaailjes vaan de club vaan honderd lede eder jaor mèt ontwörp. Diezelfde creativiteit liet heer zien es heer euze hoeskok is bij wat veer numme "'t sjendaole". Dat is einen avond in 't sezoen (welk dat zègke veer liever neet) boe-op de Keemeleers ziech mage laote goon. Ederein begrip tot dat achter geslote deure plaochtint en tot euver wat deen avond gezag en gedoon weurt noets get nao boete kump. Dao weurt in eder geval get gedroonke en lekker gegete en Karl zörg mèt zienen thermometer tot eder stökske vleis de zjuste temperatuur krijg, heet en vashèlt tot 't op is.

Karl, vaan harte perficia, ouch aan Wies, veur alles wats diech tot noe touw veur de Keemeleers höbs beteikend. Plak nog zeker 11 jaor aan die lidmaatsjap vas, want "zoe'ne gooje höbbe veer nog noets gehad...!"

PREGKA
HORECA CENTRE

Postbus 3054 6202 NB Maastricht - Tel./Fax : 043 - 3610235



**KOELINGEN
BEDRIJFSKEUKENS
AFZUIGINSTALLATIES
ESPRESSOMACHINES
HORECABENODIGHEDEN**

Vastelaovendsvereinigung De Keemeleers

organiseert in samewèrking mèt

De Gulpener Brouwerij,

Drarankenhandel Koekkelkoren
en Pepsi

WIEKER PARAAD

ZOONDAG 31 JANNEWARIE 2016



Kaffee Swaree
Kaffee Wyck
Tapperij De Poshoorn
Brands Beerhoes
Walk About

KOEKKELKOREN
DRANKEN BV



PEPSI.

AONVAANK 14.11 OOR IN DE WIEKER BRÖKSTRAOT

**VEER WINSE EEDEREIN
'NE HIELE SJOENE
VASTELAOVEND!!**

CORTJENS
Druk met Communicatie

Demertstraat 4 - 6227 AR Maastricht - 043 3614718 - info@cortjensDC.nl

